

# KENYATAAN MEDIA



**KEMENTERIAN PERDAGANGAN DALAM NEGERI DAN HAL EHWAL PENGGUNA**  
No. 13 Persiaran Perdana, Presint 2,  
62623 Putrajaya  
No. Telefon : 03-8882 5562  
No. Fax : 03-8882 5569

## **TINDAKAN TEGAS KPDNHEP TERHADAP INDIVIDU/PENIAGA YANG MENJALANKAN PENJUALAN ALAT PERANTI TEKNOLOGI PENSTRIMAN YANG MENGANDUNGI KARYA HAK CIPTA TANPA KEBENARAN SECARA FIZIKAL DAN DIGITAL**

**PUTRAJAYA, 21 Oktober 2022** - Kementerian Perdagangan Dalam Negeri dan Hal Ehwal Pengguna (KPDNHEP) sentiasa memberikan sokongan kepada hasrat Kerajaan dalam usaha merencanakan semula aktiviti ekonomi domestik setelah Negara berhadapan dengan pandemik Covid-19. Di samping itu, KPDNHEP tidak terlepas dalam menjalankan pemeriksaan dan operasi ke atas individu/peniaga yang mengambil kesempatan dan masih berdegil dalam menjalankan urus niaga cetak rompak dan barangan tiruan di seluruh Negara terutamanya penjualan alat peranti teknologi penstriman yang mengandungi karya hak cipta tanpa kebenaran secara fizikal dan digital.

2. KPDNHEP amat memandang serius perkara ini dan tidak akan berkompromi dengan mana-mana individu/peniaga yang terlibat dalam menawarkan penjualan alat peranti teknologi penstriman yang mengandungi karya hak cipta tanpa kebenaran secara fizikal atau digital. Selain itu, KPDNHEP akan bekerjasama dengan agensi penguatkuasaan undang-undang yang berkaitan antaranya Pihak Berkuasa Tempatan (PBT), Polis Diraja Malaysia (PDRM), Suruhanjaya Komunikasi dan Multimedia Malaysia (SKMM) dan pihak industri sendiri dalam usaha membanteras cetak rompak secara fizikal dan digital. Bagi tempoh 2018 hingga September 2022,

KPDNHEP telah berjaya membanteras pengedaran cetak rompak secara fizikal dengan menghasilkan sebanyak 531 kes dengan anggaran nilai rampasan sebanyak RM 5.4 juta.

3. Di samping itu juga, penguatkuasaan secara maya merupakan antara tindakan yang berkesan dalam menyekat penyebaran cetak rompak secara digital di dalam medium *internet* antaranya tindakan bagi sekatan laman sesawang (*web site blocking*) dan penurunan kandungan (*content removal*). Tindakan ini merupakan kaedah yang paling pantas dan berkesan dalam melumpuhkan aktiviti penularan cetak rompak digital dengan kerjasama pihak Suruhanjaya Komunikasi dan Multimedia Malaysia (SKMM) melalui penguatkuasaan Akta Komunikasi dan Multimedia 1988 (Akta 588) dan pihak industri atau pemilik hak cipta. Malaysia juga sering dijadikan contoh kepada negara-negara lain di atas keberkesanan melaksanakan sekatan laman sesawang (*website blocking*) dan penurunan kandungan (*content removal*) dalam melumpuhkan capaian kepada cetak rompak digital tersebut.

4. Bagi tempoh 2018 hingga September 2022, KPDNHEP telah berjaya melaksanakan sekatan laman sesawang (*website blocking*) yang mengandungi karya hak cipta tanpa kebenaran secara digital yang melibatkan 2,252 laman sesawang dan sebanyak 2,391 kandungan telah diturunkan bagi tindakan (*content removal*).

5. Inisiatif lain yang dilakukan oleh KPDNHEP untuk memerangi cetak rompak digital ini adalah dengan melakukan sekatan laman sesawang cetak

rompak melalui program *Cyber Copyright Enforcement (CYCORE)*. Bermula 2021 sehingga kini sebanyak 27 filem telah menyertai program ini dengan jumlah sekatan laman sesawang yang telah berjaya disekat adalah sebanyak 319 sekatan dan sebanyak 1,902 penurunan kandungan telah berjaya diselesaikan.

6. KPDNHEP ingin menegaskan bahawa, sekiranya didapati mana-mana individu/peniaga yang menjual penjualan alat peranti teknologi penstriman yang mengandungi karya hak cipta tanpa kebenaran tindakan tegas akan diambil di bawah seksyen 43AA, Akta Hak Cipta 1987. Jika disabitkan kesalahan, denda yang boleh dikenakan adalah tidak kurang daripada RM 10,000.00 dan tidak melebihi RM 200,000.00 atau penjara bagi suatu tempoh tidak melebihi 20 tahun atau kedua-duanya sekali.

7. Selain itu, KPDNHEP juga akan mengambil tindakan tegas dengan menggunakan peruntukan kesalahan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001, yang membolehkan kesemua akaun milik pesalah/suspek dibekukan dan dilucuthak jika didapati bersalah. Peruntukan kesalahan ini juga turut terpakai kepada mana-mana pemilik premis perniagaan atau pengurusan bangunan yang menyediakan atau menyewakan premis mereka kepada individu/peniaga yang menjalankan aktiviti penjualan alat peranti teknologi penstriman yang mengandungi karya hak cipta tanpa kebenaran dan cetak rompak kerana bersubahat dan bekerjasama dengan peniaga terbabit.

8. KPDNHEP ingin memberikan amaran kepada semua peniaga agar tidak menjual alat peranti teknologi penstriman yang mengandungi karya hak cipta yang dituntut haknya tanpa kebenaran. Tindakan penguatkuasaan serta pemantauan yang berterusan dan tegas akan dilakukan oleh pihak Kementerian kerana alat peranti teknologi penstriman ini berupaya untuk melakukan pelanggaran hak cipta dalam apa-apa karya hak cipta yang dilindungi.

9. Lanjutan daripada itu, KPDNHEP juga telah mengenalpasti beberapa laman sesawang dan media sosial yang popular di kalangan komuniti cetak rompak digital yang sering kali diadakan oleh pemilik hak cipta dan industri.

10. KPDNHEP berterima kasih kepada pihak industri dan pemilik hak cipta di atas kerjasama dalam membanteras cetak rompak secara fizikal dan digital. KPDNHEP amat mengalu-alukan sokongan dan kerjasama dari pemain industri atau pemilik hak cipta dan rakan kongsi kandungan dalam memerangi cetak rompak.

11. Orang ramai yang mempunyai sebarang maklumat berhubung salah laku peniaga berhubung perkara ini boleh terus menyalurkan aduan yang lengkap kepada pihak Kementerian melalui saluran berikut:

- i. WhatsApp 019-279 4317 / 019-848 8000
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my

v. Ez ADU KPDNHEP

**Azman bin Adam**  
**Ketua Pengarah Penguat Kuasa**  
Kementerian Perdagangan Dalam Negeri dan Hal Ehwal Pengguna,

**PUTRAJAYA, 21 Oktober 2022**

## LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapkan dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusanniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

